

পবিত্র ইঞ্জিল শরিফ ১১ নম্বর ছিপারা আল-ফিলিপিয়া পরিচিতি

আল্লা পাকর হুকুমে পবিত্র আছমানি কিতাবর অউ ছিপারা চিঠির আকারে লেখছইন, হজরত ইছা আল-মসীর সাহাবি হজরত পাউলুছে (রা:)। অনুমান করা অয়, হজরত ইছা বেহেস্তো তশরিফ নেওয়ার বাদে ৩১-৩৩ বছরর মাজে ইখান লেখা অইছে। অউ সময় হজরত পাউলুছ রোম টাউনো বাদশা কেছরর রাজবাড়ির জেল খানাত বন্দি আছিল।

অউ ছিপারা লেখার কয় বছর আগে তাইন ফিলিপি টাউনো আইছিল। হজরত ইছার খুশ-খবরি তবলিগ করার লাগি, আইয়া তাইন জমাত কাইম করলা, ইতা অইলো ইউরোপ মহাদেশর হকল পয়লা জমাত (সাহাবি নামা ১৬ রুকু দেখউক্কা)।

ইমান আনার বাদে অউ ফিলিপি জমাতর মানুষ খুব গরিব আর জুলুম-মছিবতর মাজে রইলেও, তারা অইন্য মুমিন অকলরে আর হজরত পাউলুছরে টেকা-পয়সা দিয়া সাইয্য করায়, তাইন খুশি অইয়া এরায়ে ধইন্যবাদ জানাইছইন। তারার ইমানর ফল দেখিয়া তাইন পরামিশ দিরা, তারা যানু হামেশা আল্লাই খুশি-বাসিত রইয়া আল-মসীর লাখান ত্যাগি আর নিস্বার্থ জিন্দেগি কাটাইন।

এরমাজে আছে,

- (ক) ছালাম, শুকরিয়া আর খুশি-বাসির কথা ১:১-১১ আয়াত
- (খ) হজরত পাউলুছর নিজর হালত ১:১২-২৬
- (গ) হজরত ইছার ত্যাগর নমুনা ১:২৭-২:১৮
- (ঘ) দুইজন উস্তাদরে পাঠানি ২:১৯-৩০
- (ঙ) দাদির মুছলা বাদ দিয়া আল্লার রুহে এবাদত করো ৩ রুকু
- (চ) দান-খয়রাতর লাগি ধইন্যবাদ ৪ রুকু

1 আমি পাউলুছ আর তিমথি অইলাম হজরত ইছা আল-মসীর গুলাম। অউ ফিলিপি টাউনো বসত কররা, যে পাক বন্দা অকলে হজরত ইছা আল-মসীর উপরে ইমান আনছইন এরাৱে, এৱার উস্তাদ অকলৱে আর খাদিমদার অকলৱে গেছে লেখরাম।

2 আমৱার গাইবি বাফ আল্লা পাক আর হজরত ইছা আল-মসীর রহমত আর শান্তি তুমৱার উপরে নাজিল অউক।

ফিলিপি জমাতৱ লাগি মুনাজাত

3 তুমৱার কথা যতবারউ আমাৱ ইয়াদ অয়, অতবারউ আমি আমাৱ আল্লাৱ শুকৱিয়া আদায় কৱি।

4 আমি যেবলা তুমৱার লাগি দোয়া কৱি, আমাৱ মনো খুব খুশি লইয়া দোয়া কৱি।

5 হজরত ইছা আল-মসীর তবলিগ কামৱ লাগি তো তুমৱা পয়লা থাকি অখন পর্যন্ত আমাৱে সাইয়্য কৱৱায়।

6 আমি একিন কৱি, যে আল্লায় তুমৱার দিলৱ মাজে অউ নেক কাম শুরু কৱছইন, আল-মসীয়ে দুছৱা বাৱ তশৱিফ আনা পর্যন্ত, অউ আল্লায় ই কাম পুৱা কৱবা।

7 তুমৱা তো আমাৱ মায়াৱ মানুষ, এৱলাগি তুমৱার বেয়াপাৱে আমাৱ মনৱ ভাব অলা অওয়া উচিত। আমি জেলো বন্দি হালতে বা খুশ-খবৱিৱ হক কথা যেনোউ তবলিগ কৱি না কেনে, তুমৱাও আমাৱ লগৱ রহমতৱ ভাগি।

8 এক আল্লায় জানইন, আল-মসীর মহব্বতে আমি তুমৱার লাগি কত আশিক।

9 আমি দোয়া কৱি, তুমৱার মহব্বত যানু কামিল বিবেক আর আখলে দিন দিন বাড়ে।

10 যাতে তুমৱা আখল কাটাইয়া ভলা ভলা বেয়াপাৱ অকল চিনবায়, আর আল-মসীয়ে দুছৱা বাৱ তশৱিফ আনাৱ আগ পর্যন্ত,

11 তান বলে তুমৱা নেক কাম-কাজ কৱিয়া খাটি পথে নিখুত অইয়া রইবায়। তেউ আল্লা পাকৱ গৌৱব আর তাৱিফ জাইৱ অইবো।

হজরত পাউলুছৱ নিজৱ হালত

12 ও আমার ভাই অকল, আমি চাইরাম তুমরাও জানো, আমার উপরে যেতা যেতা ঘটিছে, ইতার লাগি আসলে খুশ-খবরি তবলিগর কাম আরো বাড়িগেছে।

13 এরলাগি অনর রাজবাড়ির সিপাই অকলে আর বাদ-বাকি মানষেও জানিলিছইন, আমি তো খালি আল-মসীর লাগিউ জেল খাটিয়ার।

14 আর আমি জেলো হামানিয়ে আমরার বউত ভাইয়াইন্তে মালিকর উপরে আরো বেশ করি ভরসা করা হিকছইন, তারা ডর-ভয় ফাউরিয়া আল্লার কলাম তবলিগর লাগি আরো সাওসি অইছইন।

15 এরার মাজে কেউ কেউ ইংসা আর দলাদলির নিয়তে আল-মসীর তবলিগ করের, অইলে কেউ কেউ ভাল নিয়তে করের।

16 এরার দিলর মহব্বতেউ আল-মসীর তবলিগ করের। তারা জানইন, খুশ-খবরির পক্ষে মাতার লাগিউ আমারে আটক করা অইছে।

17 অইলে যেরা নিজর ফায়দা কামানির লাগি আল-মসীর তবলিগ করে, এরা তো ভাল নিয়তে কাম করে না। তারা চায়, আমি জেলো বন্দি রই আর আমার কষ্ট বাড়উক।

18 অইলে ইতায় কিতা আয় যায়? আসল কথা অইলো, যেমনেউ অয় না কেনে, আল-মসীর নাম তো তবলিগ অর। ইতা ধুকাবাজির নিয়তে অউক বা ছই নিয়তেউ অউক। আর অতা দেখিয়াউ আমি খুশি।

আমার ই খুশি কুনুদিন ফুড়াইতো নায়।

19 আমি তো জানি, আমার উপরে যেতা ঘটিছে, ইতার হেশ ফল অইলো, আমি নিস্তার পাইমু। তুমরার দোয়া আর ইছা আল-মসীর রুহর বলে ইতা অইবো।

20 আমার খুব মজবুত একিন আছে, আমি কুনুমন্তেউ শরম পাইতাম নায়। আমি পুরাপুর সাওস করিয়া আগে যেলা আল-মসীর গৌরব জাইর করছি, আমি মরি বা বাচি অখনও অলা জাইর অইবো।

21 কারন আমার লাগি জিন্দেগি অইলা আল-মসী আর মরন অইলো লাভ।

22 অইলে আমি যুদি বাচিয়া রই, তে আমার জিন্দেগিত খুব ভাল কাম করার সুযোগ অইবো। এরলাগি আমি বুজরাম না, আমি কুন পথ লইতাম।

23 দুইও পথেই আমারে টানের। আমার ইচ্ছা অইলো, আমি মরিয়্যা হরি আল-মসীর লগে রইতাম, অখানউ আমার লাগি ভাল।

24 অইলে তুমরার লাগি আমার বাচিয়া রওয়াখান আরো জরুরি।

25 আর অউ মনোবলে আমি ভালা করি জানি, আমি বাচমু আর তুমরার লগে রইমু, যাতে তুমরার ইমান আরো মজবুত অইয়া তুমরার খুশি বাড়ে।

26 আমি তুমরার মাজে হিরবার আইয়া হরলে, আমারে লইয়া তুমরা ইছা আল-মসীর নামে খুব খুশি করবায়।

ইছা আল-মসীর তরিকার জিন্দেগি

27 আসল বেয়াপার অইলো, তুমরা যারযির জিন্দেগিরে অউ নমুনায় কাটাও, যে জিন্দেগি আল-মসীর খুশ-খবরির লাখ। তেউ আমি নিজে আইয়া দেখি বা দুরই থাকি হনি, আমি বুজমু, তুমরা দিলে-জানে মিলিয়া মজবুত আছে। আর খুশ-খবরির মাজদি যে ইমান পয়দা অয়, অউ ইমানর লাগি হকলে মিলিয়া এক দিলে মেনত কররায়।

28 যেতায় তুমরার বিরোধিতা করইন, কুনু বেয়াপারেউ তুমরা ইতারে ডরাইও না। তেউ পরমান অইঘিবো, তারা বিনাশর পথে যাইরাগি আর তুমরা রেহাই পাইরায়। ই রেহাই খালি আল্লার গেছ থাকিউ মিলে।

29 আল-মসীর উপরে ইমান আনছে ইটা যেলা রহমত, তান লাগি জ্বলুম-মছিবত সহ্য করার সুযোগ পাইছে ইটাও তুমরার লাগি রহমত।

30 তুমরা আগে আমারে যেলা কষ্ট করাত দেখছে আর অখনও যেতা কষ্টর কথা হনরায়, তুমরাও তো অউ লাখান কষ্টর মাজে পড়িগেছে।

2

হজরত ইছার ত্যাগর নমুনা

1 আল-মসীৰ উপৰে ইমান আনলে যেবলা ভরসা মিলে, তান মহববতে যেবলা শাস্তি মিলে, তুমৱাৰ লগে যেবলা পাক ৰুহৰ ভালা সম্পৰ্ক আছে, আৰ তুমৱাৰ দিলো যেবলা মায়া-মমতা আছে,

2 তে তুমৱা আমাৰ ভিতৰৰ খুশিখান পুৱাইলাও। তুমৱা হকল এক মনে চলে, দিলে-জানে এক অও, আৰ একে-অইন্যৰে মহববত কৰো।

3 নিজৰ লাভৰ আশা বা বেটাগিৰি দেখানিৰ লাগি কুস্তা কৰিও না, বৰং নতো অইয়া নিজৰ চাইতে অইন্যৰে বেশি দাম দেও।

4 খালি নিজৰ স্বাৰ্থৰ চিন্তা কৰিও না, পৱৰ কথাও চিন্তা কৰিও।

5 হজৱত ইছা আল-মসীৰ মন যেলাখান আছিল, তুমৱাৰ মনও অলাখান বানাইলাও।

6 তাইন আসলে আল্লাই ছুৱতে ৰইলেও, আল্লাই সিংহাসন ধৰিয়া ৰাখাৰ লাগি লালছি আছিল না।

7 বৰং গুলাম বনিয়া মানুষ হিসাবে জনম লইয়া নিজৰে হুৱ বানাইলা।

8 তাইন মানুষ ছুৱতে ৰইয়া মউত পৰ্যন্ত, দুখ-কষ্টৰ সলিবৰ উপৰৰ মউত পৰ্যন্ত বাইধ্য ৰইয়া নিজৰে নতো কৰলা।

9 এৱলাগিউ আল্লায় তানৰে আৱশে-আজিমে উঠাইলা আৰ অলা ইজ্জতি এক নাম দিলা, যে নাম হকল থাকি সেৱা।

10 যাতে অউ নামৰ গুনে আছমান-জমিন আৰ পাতালৰ তামাম জানদাৰ ইছাৰ ছামনে নতো অইন,

11 আৰ গাইবি বাফ আল্লা পাকৰ গৌৱৰ লাগি স্বীকাৰ কৰইন, ইছা আল-মসীউ মালিক।

মুমিন অকল নুৱৰ লাখান

12 ও আমাৰ মায়াৰ ভাই অকল, তুমৱা তো হামেশাউ আমাৰ হুকুম মানিয়া আইৱায়। তে আমি ছামনে থাকলে যেলা মানো, অখন আমাৰ আফৰখেও অলা তুমৱাৰ দিলৰ ডৰ-খফে নেক আমল কৰো। অউ আমলৰ মাজদি দেখাও, তুমৱা গুনা থাকি নাজাত পাইলিছো।

13 বুজরায় নি, আল্লায় তুমরার দিলর মাজে অলা এক ভাব দান করছইন, ইতা আমল করলে তাইন খুশি অইন, অউ আমল করার নিয়ত আর তাক্কতও তাইন তুমরারে দিছইন।

14 তুমরা কুন্জাত তর্কা-তর্কি বা কাইজ্জা-ফসাদ না করিয়া হকল কাম করে।

15-16 যাতে ষোলআনা পরেজগার আর নিখুত বনো, আর ই জমানার খবিছ নাফরমান সমাজর মাজেও তুমরা আল্লার আওলাদ হিসাবে রও। অতা মানষর ছামনে আল্লার পাক কালাম তবলিগ করিয়া, অউ দুনিয়াতউ তুমরা আছমানর চান-সুরুজর লাখান চকচকা বনিয়াও। তেউ আল-মসী যেবলা দুহরা বার তশরিফ আনবা, হউ দিন আমি বুক ফুলাইয়া কইতাম পারমু, আমার অউ মেনত আর আটনি-খাটনি বেকামা গেছে না।

17 ছনো, যে ইমানর কুরবানির মাজদি তুমরা আল্লার এবাদত কররায়, এর উপরে যুদি আমার নিজর লউরে কুরবানি হিসাবে ঢালি দেওয়া অয়, তা-ও আমি খুশ আছি, তুমরারে লইয়া খুশি কররাম।

18 ঠিক তুমরাও অলা খুশি অও, আমার লগে খুশি করে।

দুইজন উস্তাদরে পাঠানি

19 আমি আশা করি, হজরত ইছার মর্জি অইলে আমি তিমথিরে খুব জলদি করি তুমরার গেছে পাঠাইমু, তেউ তুমরার হালত জানিয়া আমি শান্তি অইমু।

20 তিমথির লাখান ইলা আর কেউ আমার গেছে নাই, যেইন তুমরার লাগি চিন্তা করইন।

21 বাকি হকলেউ ইছা আল-মসীর বেয়াপারে চিন্তা না করিয়া, তারা যারযির ধান্দায় আছইন।

22 অইলে তিমথির বেয়াপার তো তুমরা জানো, পুতে যেলা নিজর বাফর লগে কাম করে, তাইনও অলা আল-মসীর খুশ-খবরি তবলিগর লাগি আমার লগে মেনত করছইন।

23 এরলাগিউ আমি আশা করিয়ার, আমার দশা কিতা অইবো, অখান জানার বাদেউ আমি তানরে পাঠাইতাম।

24 অইলে আমি মালিকর উপরে ভরসা করি কইয়ার, আমি নিজেও খুব জলদি করি আইতাম পারমু।

25 আর আমি মনো করিয়ার, উছাইদরে তুমরার গেছে পাঠানি খান খুব জরুর। আমার খেজমত করার লাগি তুমরা তানরে আমার গেছে পাঠাইছলায়। আমরা একলগে তবলিগ করি, ইছা আল-মসীর লাগি জিহাদ করি। এইন আমার ইমানদার ভাই।

26 তাইনও তুমরার লগে দেখা করতা চাইরা, তুমরা তান বেমারর খবর হনায়, তাইন পেরেশানিত পড়িগেছইন, এরলাগি আমি তানরে পাঠাইয়ার।

27 আসলে তাইন খুব বেমার আছলা, বেমারে তান না-বাচার হালত অইগেছিল। অইলে আল্লায় তানরে রহম করছইন। খালি তানরে নায়, তাইন বাচি যাওয়ায় আল্লায় আমারেও বউত বড় রহম করছইন, যাতে আমি এক কষ্টর উপরে আর কুনু কষ্ট না পাই।

28 এরলাগি আমি খুব খিয়ালি অইয়া তানরে পাঠাইয়ার, যাতে তানরে পাইয়া তুমরাও খুশি অও, আর আমার মনর চিন্তাও হরি যায়।

29 তে আল্লার বন্দা হিসাবে পুরাপুর খুশি অইয়া তানরে কবুল করিও, আর এরার লাখান মানষরে ইজ্জত করিও।

30 আল-মসীর তবলিগ করাত গিয়া তাইন মরার পখি অইগেছলা। আমার ছামনে না থাকায় তুমরা যে কাম করতায় পারছো না, অউ কামর লাগি তাইন নিজর জান দিতেও রাজি আছলা।

3

দাদির মুছলা বাদ দিয়া আল্লার রুহে এবাদত করে

1 ও আমার ভাই অকল, হেশ-মেশ কইরাম, মালিকর নামে খুশি করে। এক বেয়াপার লইয়া বারে বারে লেখতে আমার কুনু কষ্ট অর না, তুমরারে বাচানির লাগিউ আমি ইতা কররাম।

2 হনো, ইউ কুকরর পাল থাকি, মানি নাফরমান দলর দাদির মুছলা থাকি হুশিয়ার রইও। ইতায় তো তারার শরিলর কাটা-চিরার উপরেউ ভরসা করে।

3 আসলে আমরাউ অইলাম খাটি মছলমানি করাইল মানুষ, আমরা তো ইছা আল-মসীর নামে গৌরব করি, আল্লার রুহর বলে তান এবাদত করি, শরিলি কুন্সু এবাদতর উপরে ভরসা করি না।

4 আসলে কেউ যুদি মনো করে, নিজর শরিলি এবাদতর উপরে ভরসা করার যুক্তি আছে, তে হে বুজিলাউক, তার চাইতে আমার আরো বেশি যুক্তি আছে। আমিও ইতার উপরে ভরসা করতাম পারলাম অনে।

5 জন্মর আট দিনর দিনউ আমার মছলমানি কাম করাইল অইছিল। আমি একজন খাটি ইবরানি, আমার জনম অইছে তো বনি ইসরাইলর বিন-ইয়ামিন গুপ্তিত। হজরত মুছা নবীর শরিয়তর বেয়াপারে আমি তো ফরিশি জমাতর।

6 শরিয়ত মানার বেয়াপারে কুন্সু মানষে আমার খুত বার করতো পারছে না। ধর্মর বেয়াপারে আমি খুব কড়া, আল-মসীর জমাতর উপরেও আমি জুলুম করতাম।

7 অইলে অউ আমল করায় আমার যতো ফায়দা অইছিল, অখন আল-মসীর লাগি আমি ইতারে খেতি মনো করি।

8 আসলে আমি যার লাগি ই খেতি স্বীকার করিয়ার, এইনউ আমার মালিক ইছা আল-মসী। তানরে জানার মাজেউ হকল থাকি বড় ফায়দা, তান তুলনায় বাদ-বাকি হকলতারেউ আমি খেতি মনো করি। আমি যাতে আল-মসীরে পাই, আর আমারে যাতে আল-মসীর লগে এখানো মিলাইল দেখা যায়, অউ নিয়তেউ আমি ইতা হকলতারে ময়লার লাখান হরাইয়া ফলাইছি।

9 তে শরিয়ত মানায় আমি যে পরেজগার বনিগেছি, ইখান নায়, আল-মসীর উপরে ইমান আনায়উ আল্লায় আমারে পরেজগার হিসাবে কবুল করছইন। ই পরেজগারি খালি আল্লা থাকিউ মিলে, ইটা তো ইমানর উপরে নির্ভর করে। আল-মসীর লগে মিলার বাদেউ আমার অউ হালত অইছে।

10 তে আমি আল-মসীরে চিনতাম চাই, যে কুদরতি বলে তানরে মরা থাকি জিন্দা করা অইছিল, অউ বলরেও চিনতাম চাই। আমি তান দুখ-মছিবতর ভাগি অইতাম চাই, তাইন যেলা নিজর জান কুরবানি দিছলা, আমিও অউ মউতো শরিক অইতাম চাই।

11 আর যেকুন্সু লাখান মরন থাকি জিন্দা অওয়াতও শরিক রই।

আখেরাতর পথে চলে

12 তে আমি যেতা পাইতাম চাইরাম, ইতা যে অখনউ পাইলিছি, বা পুরাপুর কামিয়াব অইগেছি ইলা কুস্তা নায়। হজরত ইছা আল-মসীয়ে যে নিয়তে আমারে বন্দি করছইন, অউ নিয়ত পুরা করার লাগিউ আমি দৌড়াইরাম।

13 ভাই অকল, আমি মনো কররাম না, আমি ইতার লাগাল পাইলিছি। অইলে খরর হকলতা ফলাইয়া আমি দিলে-জানে ছামনেদি দৌড়াইয়ার।

14 দৌড়াই দৌড়াই চেষ্টা করিয়ার, ইছা আল-মসীর জরিয়ায় আল্লা পাকর যে বেহেস্তি দাওত আছে, পুরুষ্কার হিসাবে অউ দাওতো হামাইতাম পারি।

15 এরলাগি কইরাম, আমরা যারা হজরত ইছার পথে বউত আণ্ডুয়াই গেছি, আমরা নিয়তও অলাখান অণ্ডুয়া জরুর। আর তুমরার যুদি অইন্য কুনু নিয়ত থাকে, তে আল্লায়উ পথ বাতাই দিবানে।

16 যাই অউক, আমরা যতখান আণ্ডুয়াইছি, অউ লাখান জিন্দেগিও কাটানি উচিত।

17 ভাই অকল, তুমরা কিলান জিন্দেগি কাটাইতায়, ইতা তো আমি হিকাইছি। তুমরা আমার লাখান চলে, আর অউ লাখান যারা চলে, তারারে দেখিয়া হিকো।

18 আমি তো বউত বার তুমরারে কইছি, আর চখুর পানি ফলাইয়া অখনও কইরাম, ইলাও বউত জন আছে, যেরা আল-মসীর দুখ-কষ্টর সলিবর দুশমনর লাখান চলের।

19 তারার কপালো আছে বিনাশ। তারার পেটউ তারার আল্লা। নাফরমানি কাম লইয়া তারা বড়াই করে, খালি দুনিয়ার ধান্দায় পাগল।

20 অইলে আমরা আসল বাড়ি তো বেহেস্তো। আমরা তরাওরা মালিক, হজরত ইছা আল-মসীয়ে হন থাকি তশরিফ আনবা। আমরা তান লাগি দিলে-জানে বার চাইরাম।

21 তাইন আইয়া আমরা অউ কমজুর কায় বদলাইয়া, তান কায়র লাখান খেমতাআলা নুরর কায় দিবা। যে কুদরতি বলে তাইন হকলতা করতা পারইন, হউ বলেউ তাইন ইতা করবা।

4

1 ও আমার মায়ার ভাই অকল, আমি তুমরাে দেখতাম চাই। তুমরাউ আমার খুশি, আমার জয়র মালা। আমার মালিকর লগে তুমরা মজবুত অইয়া লাগিয়া রও।

হজরত পাউলুছর পরামিশ

2 ও আমার বইন ছালিমা আর ছাইদা, আমি মিনত করি কইরাম, এক মালিকর খেজমতো লাগাইল আছো করি, তুমরা মিলি-মিশি এক মনে চলো।

3 ও আমার লগর আসল সংগি, আমি তুমরােও মিনত কররাম, তুমি অউ বেটিন্তরে সাইয়্য করিও। আল-মসীর খুশ-খবরি তবলিগ কামো এরা আমার লগে বউত কষ্ট করছইন। কিলিমান আর অইন্যান্য ভাইয়াইন্তর লগেও কষ্ট করছইন। তারার নাম তো আল্লার জিন্দেগি খাতাত লেখা আছে।

4 মালিক ইছার নামে তুমরা হামেশা খুশি-বাসি করো। আমি হিরবার কইরাম, খুশি-বাসি করো।

5 তুমরার নরম বেবহার যানু হকল মানষর চখুত পড়ে। জানো তো, আমার মালিক খুব জলদিউ আইরা।

6 কুনু বেয়াপারেউ তুমরা পেরেশান অইও না, বরং মুনাজাত করো। তুমরার যততা চাইবার আছে, আল্লার শুকরিয়া আদায় করিয়া তন গেছে চাও।

7 তেউ আল্লার দেওয়া যে শান্তির কথা মানষে চিন্তাও করতো পারে না, ইছা আল-মসীর মাজদি অউ শান্তি আইয়া তুমরার দিল আর মনরে রইক্ষা করবো।

8 ও ভাই অকল, আমি হেশ-মেশ কইরাম, যেতা হাছা, যেতা উপযুক্ত, হক, খাটি, সুন্দর, আর ইজ্জত পাওয়ার জুকা, মানি যেতা ভালা আর যেতায় তারিফ অয়, অউ লাখান বেয়াপারে তুমরা খিয়ালি অও।

9 তুমরা আমার গেছ থাকি যে তালিম পাইছো, যেতা হনছো, যেতা দেখছো, আর যেতা কবুল করছো অতা অখন আমল করো। তেউ শান্তি দেওরা আল্লাও তুমরার লগে লগে রইবা।

দান-খয়রাতর লাগি ধইনবোদ

10 মালিকে আমার খুশি আরো বাড়াই দিলা, বউত দিন বাদে তুমরা আমারে মনো কররায়। আমার লাগি তো হামেশাউ তুমরা চিন্তা করছো, অইলে ইতা দেখানির সুযোগ পাইছো না।

11 কুনু অভাবো পড়িয়া আমি ইখান কইরাম না, যেকুনু হালতেউ সন্তুষ্ট রওয়াখান আমি জানি।

12 অভাবি বা নবাবি হালতে, উপাসি পেটে বা ভরা পেটে, ধনি বা গরিবির মাজে কিলা সন্তুষ্ট রওয়া যায়, ইতা তালিম আমি পাইছি।

13 আসলে যেইন আমারে বল-শক্তি যুগাইয়া দেইন, তান বলেউ আমি হক্কলতা করতাম পারি।

14 তা-ও তুমরা আমার কষ্টর লগে শরিক অইয়া, খুব ভালা কাম করছো।

15 ও ফিলিপি জমাতর মুমিন অকল, তুমরা তো জানো, তুমরা পয়লা খুশ-খবরি পাওয়ার বাদে আমি যেবলা মাকিদনিয়া দেশ থাকি গেছলামগি, অউ সময় তুমরা ছাড়া আর কুনু জমাতেউ আমার লগে কুনুজাত লেন-দেন করছে না।

16 আমি যেবলা থিষলনিকি টাউনো আছলাম, অউ সময় আমার অভাবর কালো তুমরা কয়বার সাইহ্য পাঠাইছো।

17 আমি তুমরার গেছ থাকি কুনু দান-দক্ষিণা চাইরাম না, অইলে তুমরার লাগি অলা এক ফল আশা কররাম, যেতা তুমরার আমল-নমাত জমা রইবো।

18 আমার হকল পাওনাউ আমি পাইলিছি। আসলে আমার যতখান জরুর, এর চাইতেও বেশি আছে। উছাইদ ভাইর আত থাকি তুমরার উপহার পাইয়া অখন আমার বউত অইছে। অউ উপহার তো আল্লাই খুশবয় আলা, আল্লার দরবারো কবুল অওয়ার জুকা কুরবানি। আল্লা পাক ইতায় খুশি অইন।

19 আমার আল্লায় তান নিজর গৌরবর ধন হিসাবে, হজরত ইছা আল-মসীর উছিলায় তুমরার হকল অভাব দুর করবা।

20 যুগে যুগে হর-হামেশা আমরার গাইবি বাফ আল্লা পাকর তারিফ জারি রউক। আমিন।

আখেরি মুনাজাত আর ছালাম

21 হজরত ইছা আল-মসীর তরিকার আল্লার হকল বন্দারে আমার ছালাম দিও। আমার লগর হকল ভইয়াইশ্তে তুমরারে ছালাম জানাইরা।

22 আল্লার যতো পাক বন্দা ই জাগাত আছইন, খাছ করি বাদশা কৈছরর বাড়ির মুমিন অকলে ছালাম জানাইরা।

23 হজরত ইছা আল-মসীর রহমত তুমরার দিলো থাকউক। আমিন॥

Sylheti New Testament (Bengali)
Sylheti: Sylheti New Testament (Bengali) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 18 Apr 2025 from source files
dated 29 Jan 2022

8c22fe10-239b-5db1-b41d-13aad0957f43